



13 da zercladur 2013

DV732\_0613\_Weisungen\_Praktikumsplaetze\_rm.docx / nr. 732

## DISPOSIZIUN DAL DEPARTAMENT

### Relasch da las directivas concernent las plazzas da praticum

#### 1. Remartgas generalas

Il 21 da mars 2012 ha il cussegl grond relaschà la lescha davart las scolas popularas dal chantun Grischun (lescha da scola; DG 421.000). Cun excepziun da l'art. 24 al. 1 entra quella en vigur il 1. d'avust 2013. En l'art. 22 da la lescha da scola è constatada l'obligaziun da las instituziuns ch'èn responsablas per la scola da metter a disposiziun, sche pussaivel, plazzas da praticum per la scolaziun da persunas d'instrucziun da tut ils stgalims.

En las disposiziuns qua avant maun regla il departament – sa basond sin l'art. 98 lit. a da la lescha da scola – la realisaziun en la pratica da questa obligaziun.

#### 2. Remartgas davart las singulas disposiziuns

##### *Art. 1*

L'incumbensa da scolaziun cumpiglia il stgalim da scolina, il stgalim da scola primara ed il stgalim secundar I. Participadas èn las instituziuns ch'èn responsablas per la scola populara publica, la scola auta da pedagogia dal Grischun (SAPGR) sco er ulteriuras instituziuns da scolaziun, cunzunt dal stgalim secundar I.

##### *Art. 2*

Ina piazza da praticum cumpiglia ina partiziun sco er l'accumpagnament tras la persuna d'instrucziun da classa. L'obligaziun d'assistenza è chausa da quellas persunas d'instrucziun che han la responsabladad per ina classa. Sch'i vegn parti ina piazza èn omaduas persunas d'instrucziun obligadas d'accumpagnar il praticum.

Instituziuns ch'èn responsablas per la scola cun in pitschen dumber da personas d'instrucziun ubain instituziuns ch'èn responsablas per la scola che, per auters motivs, pon metter a disposiziun main personas d'instrucziun han la pussaivladad d'inoltrar a l'inspecturat da scola ina dumonda respectiva en scrit.

### *Art. 3*

L'instituziun ch'è responsabla per la scola po delegar a la direcziun da la scola ubain a tschertas personas la responsabladad da designar las personas d'instrucziun da la pratica. Per evitar che las instituziuns ch'èn responsablas per la scola stoppian communitgar cun differentas instituziuns da scolaziun, surpiglia la SAPGR la coordinaziun dals stgalims da scolina e da scola primara. Las plazzas da praticum en il sector dal stgalim secundar I vegnan per regla tschertgadas da las studentas e dals students sez. Per quest motiv na dovri betg ina coordinaziun. Las plazzas da praticum che vegnan messas a disposiziun pon vegnir quintadas tenor il dumber total segund l'art. 2.

### *Art. 4*

Fin la fin da mars èn las plazzas per il proxim onn da scola per regla occupadas. Ins sto partir dal fatg che las instituziuns ch'èn responsablas per la scola hajan tras quai ina survista tgi che vegn en dumonda sco persona d'instrucziun da la pratica. Per las instituziuns da scolaziun èsi impurtant d'enconuscher, il pli tard sin quest termin, il dumber da las plazzas da scolaziun.

### *Art. 5*

Tenor las directivas da reconuschienscha da la Conferenza svizra dals directurs chantunals da l'educaziun publica (CDE) per las scolas autas da pedagogia ston las personas d'instrucziun da la pratica cumprovar ina scolaziun supplementara ed ina furmaziun supplementara. La scolaziun e la furmaziun supplementara vegnan purschidas regularmain da la SAPGR. Ellas pon vegnir quintadas per ademplir l'obligaziun d'absolver ina furmaziun supplementara tenor l'art. 63 da la lescha da scola.

### *Art. 6*

Ils custs per l'indemnisaziun da las personas d'instrucziun da la pratica sco er quels per la scolaziun e la furmaziun supplementara van a donn e cust da las instituziuns da scolaziun.

*Art. 7*


Cun l'entrada en vigur da questas directives per il 1. da schaner 2014 èn las instituziuns ch'èn responsablas per la scola obligadas per l'emprima giada il mars 2014 d'annunziar il dumber da las plazzas da praticum a l'instituziun da scolaziun.

Sa basond sin l'art. 98 lit. a da la lescha da scola

**dispona il departament d'educaziun, cultura e protecziun da l'ambient:**

1. Las directives davart las plazzas da praticum vegnan relaschadas. Suenter che questas directives èn vegnidas relaschadas pon ellas er vegnir chargiadas giu da la pagina d'internet da l'uffizi per la scola populara ed il sport.
2. Communicaziun a: scola auta da pedagogia dal Grischun, Scalärastrasse 17, 7000 Cuir; autoritads da scola e direcziuns da scola da las scolas popularas en il chantun Grischun; uniun grischuna dals cussegls da scola, dunna Gabriela Aschwanden, presidenta, Via Calanda 23, 7013 Domat; uniun da mainascolas dal Grischun, signur Eugen Huber, president, Mülistrasse 12, 7076 Parpan; uniun "magistraglia dal Grischun", signur Fabio Cantoni, president, Erikaweg 6, 7000 Cuir; controlla chantunala da finanzas; uffizi per la furmaziun professiunala; uffizi per la furmaziun media-superiura; finanzas & controlling dal DECA; uffizi per la scola populara ed il sport; departament d'educaziun, cultura e protecziun da l'ambient.

DEPARTAMENT D'EDUCAZIUN,  
CULTURA E PROTECZIUN DA  
L'AMBIENT DAL GRISCHUN



Martin Jäger, cusseglier guvernativ



## Directivas concernent las plazzas da praticum

Sa basond sin l'art. 98 lit. a da la lescha davart las scolas popularas dal chantun Grischun (lescha da scola)

relaschadas dal departament d'educaziun, cultura e protecziun da l'ambient ils 13 da zercladur 2013

### Art. 1

Questas directivas reglan la cooperaziun da las instituziuns ch'èn responsablas per la scola en connex cun la scolaziun da las persunas d'instrucziun da tut ils stgalims per metter a disposiziun plazzas da praticum.

Intent

### Art. 2

<sup>1</sup> Las instituziuns ch'èn responsablas per la scola mettan a disposiziun per regla almain in terz da las persunas d'instrucziun da classa sco persunas d'instrucziun da la pratica.

Dimensiun

<sup>2</sup> Sch'ina instituziun ch'è responsabla per la scola po metter a disposiziun main che in terz da las persunas d'instrucziun da classa, sto ella inoltrar a l'inspecturat da scola ina dumonda en scrit. Davart excepziuns decida l'inspecturat da scola.

### Art. 3

L'instituziun ch'è responsabla per la scola designescha – suenter avair consultà l'instituziun da scolaziun – tge persunas d'instrucziun che accumpognan las persunas en scolaziun. La scola auta da pedagogia dal Grischun coordinescha las attribuziuns per ils stgalims da scolina e da scola primara.

Designaziun da las persunas d'instrucziun da la pratica

### Art. 4

Las instituziuns ch'èn responsablas per la scola annunzian a l'instituziun da scolaziun annualmain fin la fin da mars il dumber da plazzas da praticum.

Mument da l'annunzia

### Art. 5

Las persunas d'instrucziun da la pratica èn obligadas da frequentar la scolaziun supplementara respectiva e las furmaziuns supplementaras appartegnentas.

Scolaziun da las persunas d'instrucziun da la pratica

### Art. 6

Ils custs da la scolaziun supplementara van a donn e cust da las instituziuns da scolaziun. Quellas indemneschan las persunas d'instrucziun da la pratica durant l'activitad da scolaziun tenor las directivas da l'instituziun da scolaziun respectiva.

Indemnisaziun

### Art. 7

Questas directivas entran en vigur il 1. da schaner 2014.

Entrada en vigur